

四庫全書

子部

欽定四庫全書

子部

太平御覽卷一百一十六

詳校官侍讀學士_臣沈咸熙

員外郎_臣牛稔文覆勘

總校官降調編修_臣倉聖脈

校對官助教_臣胡子襄

謄錄監生_臣何需霖

欽定四庫全書

太平御覽卷一百二

宋 李昉等 撰

皇王部二十七

後魏太宗明元皇帝 世祖太武皇帝

高宗文成皇帝

太宗明元皇帝

後魏書曰太宗明元皇帝諱嗣太祖道武皇帝長子也

母曰劉貴人登國七年生雲中宮太祖晚有子聞而大
悅乃大赦天下帝明睿寬毅非禮不動太祖甚奇之天
興六年封齊王拜相國加車騎大將軍初帝母既賜死
太祖乃召帝曰昔漢武帝將立其子而殺其母不令婦
人預國政使外家為亂汝當繼統故吾遠同漢武為長
久之計帝素純孝哀泣不能自勝太祖怒之帝還宮哀
不自止日夜號泣太祖知而又召之帝欲入左右曰孝
子事父小杖則受大杖避之今陛下怒盛入或不測陷

帝於不義不如且出待怒解而進不晚也帝從之乃遊行逃於外天賜六年冬十月即皇帝位大赦改元為永興元年追尊皇妣為宣穆皇后公卿大臣先罷歸不與朝政者悉復登用之是歲乞伏乾歸自稱秦王海夷馮跋僭號自稱大燕天王三年春二月詔曰衣食足知榮辱夫人飢寒切已惟恐朝夕不濟所急者溫飽而已何暇及於仁義之事乎王教之多違蓋由於此非夫耕婦織內外相成何以家給人足其簡宮人非所當御及執

作伎巧自餘悉出以賜瘠民三月詔侍臣常帶劔四年
二月登虎圈射虎夏四月宴羣臣於西宮使各獻直言
勿有所諱秋七月巡置四廂大將又仿十二時置十二
小將以陽山侯奚斤元城公元屈行左右丞相是年沮
渠蒙遜自稱河西王神瑞元年春正月以禎瑞頻集大
赦改元二年六月辛去畿陂觀漁辛酉次于濡源立烽
臺射熊于頽牛山獲之丁卯辛赤城親見長老問民疾
苦復租一年南次石亭幸上谷問百年訪賢俊復田租

之半壬申幸涿鹿登橋山觀溫泉使以太牢祀黃帝唐
堯廟至廣甯如上谷登廣甯之厯山以太牢祭虞舜廟
親加禮焉泰常元年七月帝自白鹿陂西行大獵于牛
川登釜山臨殷繁水而南觀于九十九泉三年春帝自
長川詔護高車中郎將薛繁率高車丁零十二部大人
衆二萬北畧至弱水招懷代叛降者二千餘人獲牛馬
二萬餘頭是年赫連屈丐僭稱皇帝四年夏四月車駕
有事於東廟遠蕃助祭者數百國五年五月詔曰宣武皇帝

體得一之玄遠應自然之沖妙配純化而御世演大道
以宣風大行大名未盡盛美其改宣曰道更上尊謚曰
道武皇帝是歲劉裕廢弒其主司馬德文僭稱皇帝自號
為宋七年夏四月封皇子燾為太平王拜相國初帝服
寒食散頻年動發不堪萬幾五月詔皇太子臨朝聽政
冬十月車駕南巡出自天門關踰恒嶺四方蕃服大人
各率所部從者五萬餘人十有一月太平王親統六軍
出鎮塞上八年二月築長城於長川之南起自赤城西

至五原延袤一千餘里備置戍衛三月乙巳田於鄴南
韓陵山幸汲郡至于枋頭濟自靈昌津幸陳留東郡乙
丑濟河而北西之河內造浮橋於治坂津夏四月丁卯
幸成臯城觀虎牢而城內乏水懸綆汲河帝令連艦上
施輶輻絕其汲路

輶符分切輻於
云切兵車也

又穿地道以奪其井

遂至洛陽觀石經蠻王梅安率渠帥數千人來貢方物
閏月還幸河內北登太行幸高都還晉陽賜百官王公已
下逮於厮賤無不霑洽五月還次鴈門皇太子率留臺

王公迎于句注之北庚寅車駕至自南巡冬十月廣西
宮起外牆周迴二十里是歲民飢詔所在開倉賑給十
有一月帝崩於西宮在位十五年時年三十二遺詔以
司空奚斤所獲軍實賜大臣自司徒長孫嵩以下至于
士卒各有差十有二月上謚曰明元皇帝葬于雲中金
陵廟稱太宗帝禮愛儒生好覽史傳以劉向所撰說苑
於經典正義多有所闕乃撰新集三十篇採摭經史該
洽古義兼資文武焉

世祖太武皇帝

後魏書曰世祖太武皇帝諱燾太宗明元皇帝長子也
母曰杜貴嬪天賜五年生於東宮體貌瓌異太宗奇而
悅之曰成吾業者必此子也泰常七年四月封太平王
五月為監國太宗有疾命帝總攝百揆聰明大度意豁
如也八年十一月即皇帝位大赦天下十有二月追尊
皇妣為密皇太后進司徒長孫嵩爵為北平王司空奚
斤為宣城王藍田公長孫翰為平陽王其餘普增爵位

各有差始光元年夏四月東巡幸大寧二年三月尊保
母竇氏曰保太后庚申營故東宮為萬壽宮起永安安
樂二殿臨望觀九華堂初造新宇千餘詔曰昔帝軒
制造物乃命倉頡因鳥獸之跡以立文字繼歷久遠傳
習多失其真今制定文字世所用者頒下遠近永為楷
式是年赫連屈丐死于昌僭立三年春二月起太學於
城東祀孔子以顏淵配十有一月帝率輕騎二萬襲赫
連昌至其城下徙萬餘家而還十有二月武都氏王楊

玄及沮渠蒙遜等皆遣使內附四年春正月赫連昌遣其弟平原公定率衆二萬向長安帝聞之乃遣就陰山伐木大造攻具二月車駕還宮三月遣高陽王禮鎮長安詔執金吾桓貸造橋於君子津五月車駕西討赫連昌濟君子津至于黑水帝親祈天告祖宗之靈而誓衆焉六月昌引衆出城大破之車駕入城虜昌羣弟及其諸母姊妹妻妾宮人萬數府庫珍寶車旗器物不可勝計八月壬子車駕至自西伐飲至策勲告於宗廟班軍

實以賜畱臺百寮各有差冬十有一月以氏王楊玄為都督荆梁益寧四州諸軍事假征南大將軍梁州刺史南秦王神鼎元年春正月以天下守令多行非法精選忠良悉代之二月改元是歲皇子晃生三年春正月行幸廣甯臨溫泉作溫泉之歌三月帝聞劉義隆將寇邊乃詔冀定相三州造船三十艘簡幽州以南兵集于河上以備之秋七月詔諸征鎮將杖節邊遠者聽開府辟召其次增置吏員詔大鴻臚卿杜超假節都督冀定相三州

諸軍事行征南大將軍太宰進爵為王鎮鄴為諸軍節度九月立密皇太后廟於鄴甲辰行幸統萬遂征平涼十有一月車駕至平涼先是赫連定將數萬人東禦於鄜城畱其弟上谷公社干廣陽公度洛孤城守帝至平涼登北原使赫連昌招諭之社干不降遂掘四面圍之十二月定弟社干度洛孤面縛出降平涼平收其珍寶定長安臨晉武功守將皆奔走關中平車駕東還畱巴東公延普等鎮安定四年九月加太尉長孫嵩柱國大

將軍特進左光祿大夫崔浩為司徒征西大將軍長孫
道生為司空詔曰頃逆命縱逸方夏未寧戎車屢駕不
遑休息今二寇摧殄士馬無為方將偃武修文遵太平
之化昧旦思求想遇師輔訪諸有司咸稱范陽盧玄博
陵崔綽趙郡李靈河間邢穎渤海高允廣平游雅太原
張偉等皆賢雋之胄冠冕州邦有羽儀之用庶得其人
任之政事共臻雍熙之美易曰我有好爵吾與爾縻之
如玄之比隱跡衡門不曜名譽者盡勅州郡以禮發遣

遂徵玄等及州郡遣至者數百人皆差叙用冬十月詔
司徒崔浩改定律令延和元年春正月尊保太后為皇
太后立皇后赫連氏立皇子晃為皇太子謁於太廟大
赦改元大延元年出太祖太宗宮人令得嫁大赦改元
六月詔曰去春小旱冬作不茂憂勤克已祇請靈祇上
下咸秩豈朕精誠有感何報應之速雲雨震洒流澤沾
渥有鄙婦人持方寸玉印詣潞縣侯孫家既而亡去莫
知所在玉色鮮白光照內映印有三字為龍鳥之形要

妙竒巧不類人迹文曰旱疫平推尋其理蓋神靈之報
應也朕用嘉焉比者以來禎祥仍臻所在非一天降嘉
貺將何德以酬之所以內省驚震欣懼交懷其今天下
大酺五日禮報百神守宰祭界內名山大川上答天意
以來福祿二年十一月行幸_音桐陽驅野馬於雲中置
野馬苑三年高麗契丹龜茲悅般馬耆車師粟特疏勒
烏孫渴槃陀鄯善國各遣使朝獻奉汗血馬四年春罷
沙門年五十以下五年六月車駕西討沮渠牧犍侍中

宜都王穆壽輔皇太子決畱臺事八月車駕至姑臧牧
犍兄子祖踰城來降乃分軍圍之九月牧犍兄子萬年
率麾下來降是日牧犍與左右文武五千人面縛軍門
帝解其縛待之以蕃臣之禮收其城內戶口二十餘萬
倉庫珍寶不可勝計冬十月辛酉車駕還宮徙涼州民
三萬餘家于京師太平眞君元年六月皇孫濬生大赦
改元二年春正月帝至道壇親受符籙備法駕旗幟盡
青十月封皇子伏羅為晉王翰為秦王譚為燕王建為

楚王余為吳王四年冬十一月詔曰朕承祖宗重光之緒思闡洪基恢隆萬世自經營天下剪暴除亂掃清不順二十年矣夫陰陽有往復四時有代謝授子任賢所以體息優隆功臣式圖長久蓋古今不易之令典也其令皇太子副理萬幾總統百揆諸功臣勤勞日久皆當以爵歸第隨時朝請饗宴朕前論道陳謨而已不宜復煩劇職更舉賢俊以備百官主者明為科制以稱朕心五年春正月皇太子始總百揆諸上書者皆稱臣詔曰

愚民無識信惑妖邪私養師巫挾藏識記陰陽圖緯方伎之書又沙門之徒假西戎虛誕生致妖孽非所以一齊政化布淳德于天下也自王公以下至於庶人有私養沙門師巫及金銀工巧之人在其家者皆遣詣官曹不得容隱限今年二月十五日過期不出師巫沙門身死主人門誅明相宣告咸使聞知詔曰自頃以來軍國多事未宣文教非所以整齊風俗示軌則于天下也今制自王公以下至于卿士其子息皆詣太學百工伎巧騶率

子息當習其父兄所業不聽私立學校違者師身死主人門誅六年春正月車駕行幸定州引見長老存問之
二月遂西幸上黨觀連理樹于泣氏十一月遣殿中尚書安定公朝茂率騎屯相州之陽平郡發冀州民造浮橋于礪苦高切礪五交切津七年二月幸長安存問父老丁亥幸昆明池三月詔諸州坑沙門毀諸佛像徙長安城內工巧二千家於京師車駕旋軫幸洛水夏四月車駕至自長安毀鄴城五層佛圖於泥像中得玉璽二其文

皆曰受命於天既壽永昌其一刻其旁曰魏所受漢傳
國璽八年六月西征諸將扶風公元處眞等八將坐盜
沒軍資所在虜掠賊各千萬計並斬之九年冬十月以
婚姻奢靡喪葬過度詔有司更為科限十一年春正月
行幸洛陽所過郡國皆親對高年存恤孤寡遂征懸瓠
夏四月車駕還宮賜從者及畱臺郎吏已下生口各有
差六月誅司徒崔浩九月車駕南伐冬十月車駕濟河
詔諸將分道並進使征西大將軍永昌王仁自洛陽出

壽春尚書長孫眞趨馬頭楚王建趨鍾離高涼王那自
青州趨下邳車駕自中道十一月至中山劉義隆魯郡
太守崔邪利率屬城降使使者以太牢祀孔子次于彭
城遂趨盱音盱眙音怡十二月車駕至淮詔刈崔葦作筏數
萬而濟義隆盱眙守將臧質閉門拒守將軍胡崇之等
率衆二萬援盱眙燕王譚大破之斬首萬餘淮南皆降
是月永昌王仁攻懸瓠拔之獲義隆守將趙淮送京師
斬之車駕臨江起行宮於瓜步山義隆使獻百牢貢其

方物又請進女於皇孫以求和好帝以師婚非禮許和而不許婚使散騎侍郎夏侯野報之帝詔皇孫為書致馬通問焉正平元年二月車駕濟河次于魯口皇太子朝於行宮三月車駕至自南伐飲至策勲告於宗廟夏五月大赦六月改元十月封皇孫濬為高陽王尋以皇孫世嫡不宜在藩乃止改封秦王翰為東平王燕王譚為臨淮王楚王建為廣陽王吳王余為南安王二年二月帝崩於永安宮在位二十九年時年四十五秘不發

喪中常侍宗愛矯皇后令殺東平王翰迎南安王余入而立之大赦改元為承平三月上尊諡曰太武皇帝葬於雲中金陵廟號世祖冬十月余為宗愛所賊殿中尚書長孫渴侯與尚書陸麗迎立皇孫是為高宗帝生不逮密太后及有所識言則哀慟悲感傍人太宗聞而嘉歎暨太宗不豫衣不釋帶性情儉率素服御飲膳取給而已不好珍麗食不二味所幸昭儀貴人衣無繅綵羣臣白帝更峻京邑城隍以從周易設險之義又陳蕭何

壯麗之說帝曰古人有言在德不在險屈丐蒸土築城而朕滅之豈在地也天下未平方須民力土功之事朕所未為蕭何之對非雅言也每以財者軍國之本無所輕費至於賞賜皆是死事勲績之家親戚愛寵未曾橫有所及

高宗文成皇帝

後魏書曰高宗文成皇帝諱濬景穆皇帝之長子也母郁久閭氏真君元年六月生於東宮帝少聰達世祖愛之

常置左右號世嫡皇孫年五歲世祖北巡帝從在後逢虜帥桎一奴欲加其罰帝謂之曰奴今遭我汝宜釋之帥奉命解縛世祖聞之曰此兒雖小欲以天子自處意奇之既長風格異常每有大政常參決可否正平二年二月中常侍宗愛逆立南安王余十月又賊余於殿中尚書長孫渴侯與尚書陸麗奉迎皇孫即帝位於永安前殿大赦改元興安元年十二月初復佛法二年二月發京師五千人穿天淵池是月劉義隆子劼殺其父而

自立夏五月行幸崞

音郭

山是月劉劭弟駿殺劭而自立

閏月太后赫連氏崩八月詔曰朕以眇身纂承大業即位以來百姓晏安風雨順序邊方無事衆瑞兼呈不可稱數又於內苑獲方寸玉印其文曰子孫長壽羣公卿士咸曰休哉豈朕一人克臻斯應實由天地祖宗降佑之所致也思與兆庶共茲嘉慶其令民大酺三日諸殊死已下各降罪一等興光元年二月帝至道壇登受圖籙七月皇子弘生大赦改元大安元年遣尚書穆伏眞

等三十人巡行州郡觀察風俗二年春正月立皇后馮氏二月丁巳立皇子弘為皇太子大赦天下三年冬十月將東巡狩詔太宰常英起行宮於遼西黃山四年春正月至遼西黃山宮二月登碣石山觀滄海大饗羣臣於上班賞進爵各有差改碣石山為樂遊山築壇記行於海濱冬十月北巡至陰山有故冢毀發詔曰昔姬文葬枯骨天下歸仁自今有穿毀墳隴者斬之和平二年正月詔曰刺史牧民為萬里之表自頃每因發調逼

民假貸大商富賈要射時利旬日之間增贏十倍上下
通同分以潤屋故編戶之家困於凍餒豪富之門日有
兼積為政之弊莫過於此其一切禁絕犯者十疋以上
皆死布告天下咸知禁令二月行幸中山遂幸信都車
駕所過皆親對高年問民間疾苦詔民年八十以上一
子不從役靈丘南有山高四百餘丈乃詔羣臣仰射山
峯無能踰者帝彎弧發矢出山三十餘丈過山南二百
二十步遂刊石勒銘三年冬十月詔曰夫三代之隆莫

不崇尚年齒今選舉之官多不以次令頒白處後晚進
居先豈所謂彛倫攸叙者也諸曹選補宜各先盡勞舊
才能十二月制戰陣之法十有餘條因大饗耀兵有飛
龍騰蛇魚麗之變以示威武四年春三月賜京師民年
七十已上大官厨食以終其年夏四月上幸西苑觀射
虎三頭五月行幸陰山秋七月詔曰朕每歲閏月命羣
臣講武平壤所幸之處必立宮壇靡費之功損勞非一
宜仍舊貫何必改作也八月遂畋于河西詔曰朕順時

田獵而從官殺獲過度既殫禽獸乖不合圍之義其勅
從官及典圍諸將校自今已後不聽濫殺其田獲皮肉
別自頒賚十二月詔曰名位不同禮亦異數所以殊等
級示軌儀今喪葬嫁娶大禮未備貴勢豪富越度奢靡
非所謂式昭典憲者也有司可為之條格使貴賤有章
上下咸序著之于今詔曰夫婚姻者人道之始尊卑高
下宜令區別然中代以來貴族之門多不率法或貪利
財賂或夤緣私好在於苟合無所擇選今貴賤不分巨

細同貫塵穢清化虧損人倫將何以宣示典謨垂于來裔今制皇族師傅王公侯伯及士民之家不得與百工伎巧卑姓為婚犯者加罪六年四月破洛那國獻汗血馬普嵐國獻寶劍五月帝崩於太華殿在位十四年時年二十六六月上尊諡曰文成皇帝廟號高宗葬雲中之金陵

太平御覽卷一百二

欽定四庫全書

太平御覽卷一百三

宋 李昉等 撰

皇王部二十八

後魏顯祖獻文皇帝 高祖孝文皇帝

世宗宣武皇帝 肅宗孝明皇帝

顯祖獻文皇帝

後魏書曰顯祖獻文皇帝諱弘高宗文成皇帝之長子

也母曰李貴人興光元年秋七月生於陰山之北太安二年二月立為皇太子聰叡機悟幼而有濟民神武之規仁孝純至禮敬師友和平六年夏五月即皇帝位大赦天下秋七月太尉乙渾為丞相事無大小皆決於渾是歲劉子業叔父殺子業僭立天安元年春正月大赦改元二月丞相太原王乙渾謀反伏誅皇興元年閏正月劉彧青州刺史沈文秀冀州刺史崔道固並遣使請舉州內屬二年夏四月高麗庫莫奚契丹于聞波斯諸

國各遣使朝獻四年三月詔宣告天下民有病者所在
官司遣醫就家診視所用藥物任醫量給之五年八月
帝欲禪位於叔父京兆王子推羣臣固請帝乃止丁未
下詔曰朕承洪業運屬太平淮岱率從四海清宴是以
希心元古志存淡泊躬覽萬務則損頤神之和一月或
曠政有淹滯之失且子有天下歸尊於父父有天下傳
之於子今稽協靈運考會羣心爰命儲宮踐昇大位朕
優游恭已栖心浩然社稷乂安克廣其業不亦善乎百

官有司其祇奉太子以答天休宣布宇內咸使聞悉於是羣公奏曰三皇之澹泊無為故稱皇是以漢高祖既稱皇帝尊其父為太上皇明不統天下今皇帝幼冲萬機大政猶陛下統之謹上尊號太上皇帝乃從之太上皇帝徙御崇光宮採椽不斷土堦而已國之大事咸以聞承明元年年二十三崩于永安殿在位六年諡曰獻文皇帝廟號顯祖葬雲中金陵

高祖孝文皇帝

後魏書曰高祖孝文皇帝諱宏顯祖獻文皇帝之長子也母曰李夫人皇興元年八月生平城紫宮神光照室天地氤氲和氣充塞帝生而潔白有異姿襁褓岐嶷長而淵裕仁孝綽然有君人之表顯祖尤愛異之三年夏六月立為皇太子五年秋八月即皇帝位於太華前殿大赦改元延興元年冬十月沃野統萬二鎮叛詔太尉隴西王元賀追擊至枹_{音符}罕滅之斬首三萬餘級徙其餘逆於冀定相三州為營戶十二月詔訪渾後獲東萊

郡民媯苟之復其家畢世以彰盛德之不朽二年春二月詔曰尼父稟達聖之資體生知之量窮理盡性道光四海頃者淮徐未賓廟隔非所至今祠典寢頓禮章殄滅遂使女巫妖覲淫進非禮殺生鼓舞倡優媒音泄狎豈所以尊明神敬聖道者也自今已後有祭孔子廟制用酒醑而已不聽婦女合雜以祈非望之福犯者以違制論夏四月詔工商雜類盡聽赴農詔沙門不得去寺浮遊民間是日劉彧死于昱立秋七月詔州郡縣各遣二人

才堪專對者赴九月講武當親問風俗三年二月詔縣
令能靜一縣劫盜者兼治二縣即食其祿能靜二縣者
兼治三縣二遷為郡守二千石能靜二郡上至三郡亦
如之三年遷為刺史三月詔諸倉屯穀麥充積者出賜
貧民夏四月詔以孔子二十八世孫魯郡孔乘為崇聖
大夫給以十戶供灑掃四年九月以劉昱內相攻戰詔
將軍元蘭將三萬騎及假東陽王丕為後繼代蜀漢承
明元年六月太上皇帝崩大赦改元皇太后為太皇太

后臨朝稱制秋七月追尊皇妣李貴人為思皇太后太和元年七月劉昱死弟準僭立二年夏四月京師旱祈天災於北苑親自禮焉減膳避正殿澍雨大洽大赦九月龜茲國遣使獻駝馬二年四月吐谷渾國遣使獻羆牛五十頭是年島夷蕭道成廢其主劉準而僭立自號曰齊四年春罷畜鷹鷄之所以其地為報德佛寺五月詔會京師耆老賜錦綵衣服几杖稻米蜜麵復家人不徭役六年三月蕭道成死子頤僭立七年閏四月皇子

生大赦天下定州上言為粥給飢民所活九十四萬七千
餘口八年八月詔曰帝業至重非廣詢無以至治今制
百辟卿士工商吏民各上便益利民益治損化傷政直
言極諫勿有所隱務令辭無煩華理從簡實朕將親覽
以知世要使言之者無罪聞之者足以戒九年春正月
詔曰圖識之典起於三季既非經國之典徒為妖邪所
憑自今圖識秘緯及名為孔子閉房記者一切皆焚之
留者以大辟論又諸巫覡假稱神鬼妄說吉凶及委巷

諸卜非墳典所載者嚴加禁斷大饗羣臣于大華殿班
賜皇誥十年春正月帝始服袞冕饗萬國二月初立黨
里隣三長定民戶籍夏四月始制五等公服帝初以法
服御輦已酉郊八月給尚書五等品爵已上朱衣玉珮
大小組綬九月詔起明堂辟雍冬十月有司議依故事
配始祖於南郊十有一年春正月詔定樂章非雅者除
之十有一月詔罷尚方錦繡綾羅之工四民欲造任之
無禁其御府衣服金銀珠玉綾羅錦繡太官雜器太僕

乘具內庫弓矢出其大半班賚百官及京師士庶下至
工商皂隸逮於六鎮戍士各有差十二月詔秘書丞李
彪著作郎崔光改析國記依紀傳之體十有二年春正
月初建五斗旌旗五月詔六鎮雲中河西及關內六郡
各修水田通渠灌溉增置彝器於太廟九月起宣文堂
經武殿十三年春正月車駕有事於園丘於是初備大
駕七月幸靈泉池與羣臣御龍舟賦詩而罷立孔子廟
於京師十有四年八月詔議國之行次九月太皇太后

馮氏崩冬十月癸文明太皇太后於永固陵車駕謁永固陵羣臣固請公除帝不許帝居廬引見羣寮於太和殿太尉東陽王丕等據權制固請帝引古禮往復羣臣乃止十五年春正月帝始進蔬食自正月不雨至於癸酉有司奏祈百神詔曰昔成湯遇旱齊境逢災並不由祈山川而致雨皆至誠發中澍潤千里萬方有罪在予一人今普天喪恃幽顯同哀神若有靈猶應未忍安饗何宜四氣未周便行祀事唯當考躬責已以待天譴五

月議改律今於東明觀析疑獄八月議養老又議肆類上帝禋于六宗之禮帝親臨決詔郡國有時物可以薦宗廟者貢之移道壇於桑乾之陰改曰崇虛寺詔諸州秀才先盡才學乙巳親定袷禘之禮十有一月詔二千石考在上者假四品將軍賜乘黃馬一疋上中者五品將軍上下者賜衣一襲十有二月帝為高麗王璉舉哀於城東行宮車駕迎春於東郊十有六年春正月饗羣臣於太華殿帝始為王公興懸而不樂宗祀顯祖獻文

皇帝於明堂以配上帝遂昇靈臺以觀雲物詔定行次以水承金制諸遠屬非太祖子孫及異姓為王者皆降為公公為侯侯為伯子男仍舊皆除將軍之號二月詔祀唐堯於平陽祀虞舜於廣甯禹於安邑周文於洛陽改謚宣尼曰文聖尼父告謚孔廟夏四月頒新律令大赦天下八月丙午司徒尉元以老遜位以尉元為三老游明根為五更又養國老庶老詔曰文武之道自古並行威福之施必也相籍故三王至仁尚有征伐之事夏殷明睿

未捨兵甲之行國家雖崇文以懷九服修武以寧八荒然於習武之方猶為未盡將於馬射之前先行講武之式可勅有司豫修場埒其列陣之儀五戎之數別俟後勅冬十月太極殿成大饗羣臣十有七年夏四月立皇后馮氏六月帝將南伐詔造河橋立皇子恂為皇太子秋七月以皇太子立詔賜民為父後者爵一級是月蕭頤死孫昭業僭立八月車駕發京師南伐步騎百餘萬太尉丕奏請以宮人從詔曰臨戎不語內事宜停車駕

至泗州幸并州親高年問所疾苦車駕所經傷民秋稼者畝給穀五斛戊辰詔洛懷并泗所過四州賜高年爵百年以上假縣令九十已上賜爵三級八十已上賜爵二級七十已上賜爵一級鰥寡孤獨不能自存者人粟五斛帛二疋幸洛陽周巡故宮基址帝顧謂侍臣曰晉德不修早傾宗祀荒毀至此用傷朕懷遂詠黍離之詩為之流涕觀洛陽橋幸太學觀石經詔六軍發軫帝戎服執鞭御馬而出羣臣稽顙於馬前請停南伐帝乃止仍定

遷都之計冬十月辛金墉城詔徵司空穆亮與尚書李
沖將作大匠董爵經始洛京己卯幸河南城幸豫州戒
嚴設壇於滑臺城東告行廟以遷都之意大赦天下幸
鄴城十有八年春朝羣臣於鄴宮車駕南巡幸洛陽西
宮二月行幸河陰規建方澤之所車駕北巡至平城宮
臨朝堂部分遷留三月罷西郊祭天帝臨太極殿喻在
代羣臣以遷移之畧秋七月以宋王劉昶為大將軍是
月島夷蕭鸞殺其主蕭昭業立業弟昭文冬十月親告

太廟奉遷神主車駕發平城宮次於山中之唐湖是月
蕭鸞廢殺其主昭文而僭立十月丁丑車駕幸鄴經比
干墓傷其忠而獲戾親為弔文樹碑刻之己丑車駕至
洛陽蕭鸞雍州刺史曹虎據襄陽降十有二月戊申車
駕至懸瓠詔壽陽鍾離馬頭之師所獲男女口皆放還
南十有九年春正月饗羣臣於懸瓠講武於汝水之西
大賚六軍車駕濟淮二月辛酉公山路中雨甚詔去蓋
見軍士病者親恤之車駕至鍾離軍士擒鸞卒三千帝

曰其君實惡其民何罪於是免歸之車駕發鍾離遣使
臨江數蕭鸞罪惡幸小沛遣使以太牢祭漢高祖廟行
幸瑕丘使以太牢祀岱嶽詔選諸孔宗子一人封崇聖
侯邑百戶以奉孔子之祀又詔兗州為孔子起園柏修
飾墳壠更建碑銘褒揚聖德行幸滑臺次于石濟車駕
至自南伐六月詔始為漢語不得以北俗之語言於朝
廷若有違者免所居官詔求天下遺書秘閣所無有裨
時用者加以優賞詔遷洛之民死葬河南不得還北於

是代人南遷者悉為河南洛陽人詔改長尺大斗依周禮制度頒之天下八月詔選天下武勇之士十五萬人為羽林虎賁以充宿衛九月六宮及文武盡遷洛陽十有二月引見羣臣於光極堂宣示品令為大始之選二十年春正月詔改姓為元氏二月詔介山之邑聽為寒食其餘禁斷帝以久旱咸秩羣神自癸未不食至于乙酉是夜澍雨大洽十有二月開鹽池之禁與民共之置常平倉二十有一年春正月立皇子恪為皇太子夏四

月幸長安遣使者以太牢祭周文王於豐祭武王於鎬
六月車駕至長安帝親為羣臣講喪服於清徽堂八月
車駕南討九月車駕至新野冬十月四面進攻不克詔
左右軍築長圍以守之二十有二年春正月拔新野三
月大破蕭鸞平北將軍崔惠景黃門郎蕭衍軍於鄧城
斬獲虜首二萬有餘秋七月詔曰朕以寡德屬茲喪亂
實賴羣英凱清南夏宜約躬賞効以勸茂績后之私府
便可損半六宮嬪御五服男女常需恒供亦今減半在

戎之親三分省一是月蕭鸞死子寶卷僭立九月帝以蕭鸞死禮不伐喪乃詔反旆二十有三年春正月朝羣臣於鄴宮三月車駕南伐帝不豫司徒彭城王勰侍疾禁中且攝百揆車駕至馬圈賊將蔡道福成公期率數萬人棄順陽遁走帝疾甚車駕北次穀塘原詔司徒勰徵太子於魯陽踐祚夏四月帝崩於穀塘原之行宮在位二十九年時年三十二秘諱至魯陽發喪還京師上諡曰孝文皇帝廟曰高祖葬長陵帝幼有至性孝敬寬

慈母垂矜捨進食者曾以熱羹傷帝手又曾於食中得蟲
穢之物帝笑而恕之宦者譖帝於太后太后大怒杖帝
數十帝默然而受不自明太后崩後亦不以介意聽覽
政事從善如流哀矜百姓恒思所以濟益天地五郊宗
廟二分之禮常必躬親不以寒暑為倦雅好讀書手不
釋卷五經之義覽之便講學不師授探其精奧史傳百家
無不該涉善談莊老尤精釋義才藻富贍好為文章詩
賦銘頌有興而作有大文筆馬上口授及其成也不改

一字自泰和十年已後詔冊皆帝之文也其餘文章百有餘篇愛竒好士情如飢渴待納朝賢隨才輕重常寄以布素之意悠然玄邁不以世務嬰心又少善射有膂力年十餘歲能以指彈碎羊膊骨及射禽獸莫不隨志而斃之至年十五便不殺生射獵之事悉止性儉素常服澣濯之衣鞍勒鐵木而已帝之雅志皆此類也

世宗宣武皇帝

後魏書曰世宗宣武皇帝諱恪高祖孝文皇帝第二子

母曰高夫人初夢為日所逐避之牀下日化為龍繞已數匝寤而驚悸既有娠泰和七年閏四月生帝於平城宮二十二年正月立為皇太子二十三年夏四月即皇帝位于魯陽大赦天下帝居諒闇委政宰輔秋八月遵遺詔高祖三夫人以下悉歸家景明元年春正月車駕謁長陵大赦改元丁未蕭寶卷豫州刺史裴叔業以壽春內屬二年春正月帝始親政二月詔曰治尚簡靜任貴應事州府佐史除授稍多誠為損弊無益政道又

京師百司寮屬殷雜官有閒長者亦同此例苟非精要
悉從蠲省是月蕭衍立寶卷弟南康王寶融為主年號
中興東赴建業九月發畿內夫五萬五千築京師三百
二十三防四旬而罷己亥立皇后于氏十有一月築園
丘於伊水之陽仍有事焉是月寶卷直後張齊殺寶卷
降蕭衍衍克建業三年三月寶卷弟建安王寶寅來降
是月蕭衍又廢其主寶融而僭立自稱曰梁九月車駕
行幸鄴詔使者弔殷比干墓閱武於鄴南冬十月帝親

射遠及一百五十步羣臣勒銘於射所四年春正月車
駕籍田於千畝三月皇后親蠶於北郊夏四月南天竺
國獻辟支佛牙正始元年春正月大赦改元八月詔洛
陽令有大事聽面敷奏乙酉元英攻義陽拔之擒送蕭
衍冠軍蔡靈等十餘將英大破衍將仍清三關冬十有
一月勅有司依漢魏舊章營繕國學十二月以苑牧公
田分賜代遷之戶詔羣臣議定律令二年詔尚書李崇
太府卿于忠散騎常侍游肇諫議大夫鄧羨俱為大使

糾斷外州畿內守令之徒咎失彰露者即便施決州鎮
重職聽為表聞三年春正月皇太子生大赦天下十一
月帝為京兆王愉清河王鐸廣平王懷汝南王悅講孝
經於式乾殿四年十一月禁河南畜牝馬自碣石至於
劔閣東西七千里置二十二都尉永平元年六月詔曰
慎重刑獄著於往誥朕御茲寶歷明鑒未遠斷決煩疑
實有攸愧可依洛陽舊圖修聽訟觀農隙起功及冬令
就當與王公卿士親臨錄問八月冀州刺史京兆王愉

據州反假尚書李平鎮北將軍行冀州刺史討之大赦
改元平克信都執愉羣臣請誅帝弗許詔送京師二年
春正月胡密步就磨怛密槃是悉萬斤辛豆郛越拔怛
諸國並遣使朝獻嘽噠薄知國遣使來朝貢白象高昌
國遣使朝貢冬十月郢州獻七寶牀詔不納十一月詔
禁屠殺含孕以為永制己丑帝於式乾殿為諸僧朝臣
講維摩詰經三年冬十月詔曰朕乘乾御歷年周一紀
而道謝擊壤教慙刑措至於下民之瘼音窮鰥疾苦常恐

之此而不卹豈為民父母之意也可勅太常於閒敞之處嚴勅醫署分師療治考其能否而行賞罰雖齡數有期修短分定然六疾不同或賴針石庶秦扁之言理驗今日又經方浩博流傳處廣應病投藥卒難窮究更令有司集諸賢士尋篇推簡務存精要取三十餘卷以班九服郡縣備寫布下鄉邑使知救患之術延昌元年三月京師穀貴出倉粟八十萬石以賑貧者夏四月詔曰泗州地震陷裂死傷甚多言念毀沒有酸懷抱亡者不

可復追生病之徒宜加療救可遣太醫折傷醫并給所
須之藥就治之大赦改元二年夏四月庚子以絹十五
萬疋賑恤河南郡飢民三年春二月詔曰泗州秀容郡
敷城縣鴈門郡原平縣並自去年四月以來山鳴地震
于今不已告謹彰咎朕甚懼焉祇畏兢兢若臨淵谷可
恤廣寬刑以答災謹四年正月甲寅帝不豫丁巳崩于
式乾殿時年三十三諡曰宣武皇帝廟號世宗葬景陵
帝幼有大度喜怒不形于色雅性儉素初高祖欲觀諸

子志尚乃大陳寶物任其所取京兆王愉等皆競取珍
玩帝惟取骨如意而已高祖大奇之庶人恂失德高祖
謂彭城王勰音協曰吾固疑此兒有非常志相今果然矣
雅愛經史尤長釋氏之義每至講論連夜忘疲善風儀
容貌臨朝淵嘿端嚴若神有人君之量矣

肅宗孝明皇帝

後魏書曰肅宗孝明皇帝諱詡世宗宣武皇帝之第二
子母曰胡充華永平三年三月帝生于宣光殿之東北

有光照于庭中延昌元年十月立為皇太子四年春正月丁巳夜即皇帝位大赦天下詔太保高陽王雍入居西北堂決庶政又詔任城王澄為尚書令百官總已以聽於二王二月尊皇后高氏為皇太后三月皇太后出俗為尼徙御金墉城八月尊太妃為皇太后帝朝皇太后於宣光殿大赦天下羣臣奏請皇太后臨朝稱制九月皇太后親覽萬幾熙平元年春正月大赦改元二月八日宴太祖以來宗室年十五以上於顯陽殿申家人

之禮九月詔曰察訟理冤實惟政首躬親聽覽民信所
由自今月望當暫出城闔親決滯枉主者可宣諸近遠
咸使聞知神龜元年二月詔以神龜表瑞大赦改元七
月開恒州銀山之禁與人共之二年九月皇太后幸崧
高山正光元年秋七月侍中元乂中常侍劉騰奉帝前
殿矯皇太后詔曰世宗宣武皇帝以睿明承業廓寧區
夏而鴻功未半早年登遐乃車書弗同勅冠尚熾幼主
稚弱夙纂寶厯曾是宗祏莫克祗奉朕所以敬慎羣請

臨朝總政黽勉從事以迄于茲自比春來先疾屢發夏
首及今數加重劇恐不堪日釐萬務巨細兼省帝齒周
星紀識學逾躋日就月將人君道茂足以撫綏萬邦諧
決百揆朕當率前志敬遜別宮乃幽皇太后於北宮殺
太傅領太尉清河王懌諸人總勒禁旅決事殿中帝加
元服大赦改元九月蠕蠕主阿那環來奔戊戌以太師
高陽王雍為丞相十月詔曰蠕蠕世雄朔方專制漠裔
隣通上國百有餘載宜優以賓禮期之立功疏爵胙土

大啓河岳可封朔郡公蠕蠕王食邑一千戶錫以袞冕
之禮蓋祿秩儀衛同於戚藩二年三月駕幸國子學講
孝經祀孔子以顏淵配十有二月詔司徒崔光安豐王
延明等議定服章三年春正月辛亥帝耕籍田十有一
月車駕有事園丘詔曰治厯明時前王茂軌孝成正律
奕代通規去歲表瑞中始命儒官改度易憲如會旅衡
今天正斯始陽煦將開品物初萌宜變耳目所謂魏雖
舊邦其厯維新者也便可頒宣內外號曰正光厯思與

億兆共此維新可大赦天下十二月以牧守妄立碑頌輒興寺塔第宅奢侈店肆商販詔中尉端衡肅厲威風以見事糾劾七品六品祿足代耕亦不聽錮店占肆爭利城市也四年春二月蠕蠕主阿那環帥衆犯塞遣尚書左丞元孚為北道行臺持節喻之四月阿那環執孚驅畜牧北遁詔驃騎大將軍尚書令李崇中軍將軍兼尚書右僕射元纂帥騎十萬討蠕蠕出塞三十餘里不及而還五年泰州城人莫折太提據城反自稱秦王殺

刺史李彥詔雍州刺史元志討之南秦州城人孫掩張
長命韓祖香據城反殺刺史崔遊以應太提遣城人卜
朝襲克高平殺鎮將赫連畧行臺高元榮太提尋死子
念生代立僭稱天子年號天建置立百官孝昌元年春
正月徐州刺史元法僧據城反害行臺高諒自稱宋王
年號天啓遣其子景仲歸於蕭衍遣其將朝龍牙成景
攜元畧等帥衆赴彭城詔秘書監安樂王鑒回師以討
之鑒於彭城南擊元畧大破之盡俘其衆既而不備為

元法僧所敗衍遣子豫章王綜入守彭城法僧擁其寮屬守令兵武及郭邑士女萬餘口南入夏四月辛卯皇太后復臨朝攝政引羣臣面陳得失詔曰神龜之末權臣擅命元乂劉騰陰相影響遂使皇太后幽隔後宮無君之心積習稍久不臣之迹緣事彌彰蔽耳目之明專生殺之柄天下為之不康四郊由茲多壘此而可忍孰不可忍騰身既死可追削爵入之罪狀誠合徽纒但以宗支舅戚特全貸之法可除名為民秋七月詔斷遠近貢獻

珍寶違者免官九月詔減天下租調之半十二月山胡
劉蠡升反自稱天子置官寮二年春正月五原降戶鮮
于修禮反于定州年號魯興元年二月帝及皇太后臨
大夏門親覽冤訟六月詔曰自運艱屬棘歷載於茲烽
驛交馳征鼓不息朕威德不能遐被經畧無以及遠俾
是蒼生罹此塗炭何以苟安黃屋無愧黔黎今便避居
正殿蔬食素服當親自招募收集忠勇其有直言正諫
之士敢決徇義之夫二十五日悉集華林東門人別引

見共論得失班告内外咸使聞知八月賊帥元洪業斬
鮮于修禮請降為賊黨葛榮所殺都督爾朱榮於泗州
執刺史尉慶賓令其從叔羽生統州事九月葛榮敗都
督廣陽王淵章武王融於博野白牛邏去聲融歿於陣榮
自稱天子國號曰齊稱廣平冬十一月杜洛周攻陷幽
州執刺史王延及行臺常景丙午稅京師田租每畝五
升借貸公田者一斗閏月稅市人出入者各一錢店舍
為五等三年春正月葛榮陷殷州刺史崔楷固節死之

三月詔金紫光祿大夫源子邕為大都督討葛榮冬十月以衛將軍討虜大都督爾朱榮為車騎將軍儀同三司雍州刺史蕭寶寅據州反自號曰齊年稱隆緒武泰元年春三月定州為杜洛周所陷執刺史楊津是月皇女生秘言皇子大赦改元二年帝崩於穎陽殿年十九皇太子即位大赦天下皇太后詔曰皇家握歷受圖年將二百祖宗累聖社稷載安朕以寡昧親臨萬國識謝塗山德慙文母屬妖逆迭興四郊多故實望穹靈降佑麟

趾衆繁自潘充華有孕椒宮冀誕儲貳而熊羆無兆維
虺遂彰于時以國步未康假稱統胤欲以底定物情係
仰宸極何圖一旦弓歛莫追國道中微大行絕祀皇曾
孫故臨洮王寶暉世子釗體自高祖天表作異大行平
日養愛特深義齊若子事符當璧及翌日弗愈大漸彌
留乃延入清蒲受命玉几暨陳衣在庭登策靡及允膺大
寶即日踐祚朕是用惶懼忸怩心焉靡訴今喪君有君
宗社惟固宜崇賞卿士爰及百辟凡厥在位並加陟叙

幼主即位儀同三司大都督爾朱榮抗表請奔喪乃勒兵而入三月上尊諡曰孝明皇帝葬於定陵廟號肅宗夏四月爾朱榮濟河皇太后幼主皆崩

太平御覽卷一百三

欽定四庫全書

太平御覽卷一百四

宋 李昉等 撰

皇王部二十九

後魏敬宗孝莊皇帝 節閔皇帝

廢帝安定王 孝武皇帝

文皇帝 廢帝

恭皇帝 東魏孝靜皇帝

敬宗孝莊皇帝

後漢書曰敬宗孝莊皇帝諱子攸彭城王勰勰音之

第三子母曰李妃肅宗初以勰有魯陽翼衛之功封

帝武城縣開國公幼侍肅宗於禁內及長丰神秀慧姿

貌甚美拜中書侍郎城門校尉兼給事黃門侍郎雅為

肅宗所親待長直禁中遷散騎常侍御史中尉孝昌二

年八月進封長樂王歷位侍中中軍將軍及武泰元年

春二月肅宗崩大都督爾朱榮將兵向京師謀欲廢立

以帝家有忠勲且無人望陰與帝通榮乃帥衆來赴夏四月帝與兄弟夜北渡河會榮於河陽南濟河即位以兄彭城王邵為無上王弟霸城公子正為始平王榮為侍中都督內外諸軍事大將軍尚書令領軍將軍領左右衛封太原王百僚相率有司奉璽綬備法駕奉迎於河梁車駕巡河西至陶渚榮以兵權在已遂有異志乃害靈太后及幼主次害無上王幼始平王子正公卿以下二千餘人列騎衛帝遷於便幕車駕入宮御太極殿

大赦天下改武泰為建義元年是月汝南王悅北海王
顥臨淮王或前後奔蕭衍郢州刺史元顥達據城叛五
月加大將軍爾朱榮北道大行臺以尚書右僕射元羅為
東道大使征東將軍光祿勳元欣副之巡方黜陟先行
後聞大將軍爾朱榮還晉陽帝餞於邙陰六月通直散
騎常侍高乾邕及弟等率流民起兵於齊州之太原頻
敗州軍詔東道大使元欣喻旨乃降是月葛榮飢使其
僕射任褒帥車三萬餘乘南寇至沁州幽州平北府主

簿河間邢杲帥河北流民十餘萬戶反於青州之北海
自署漢王年號天統詔諸有私馬仗從戎者職人優兩
大階詔當親御六戎掃清燕代大將軍太原王爾朱榮
帥精銳十萬為左軍上黨王天穆總衆八萬為前軍司
徒公陽春勒兵十萬為右軍司空公穆紹統率八萬為
後軍是月葛榮衆退屯相州之北七月齊獻武王於鄴西
北招慰葛榮別帥稱王者七人衆萬餘降之加大將軍
爾朱榮柱國大將軍錄尚書事光州人劉舉聚衆數千

反於濮陽自稱皇武大將軍是月高平鎮人万俟

墨其
二音

醜奴偕大位置百官八月葛榮帥衆圍相州九月詔太

尉公上黨王天穆討葛榮次於朝歌以征東將軍齊州

刺史元欣為沛郡王柱國大將軍爾朱榮率騎七千討

葛榮於滏口破擒之餘衆悉降冀定滄瀛殷五州平大

赦天下改為永安元年以柱國大將軍太原王爾朱榮

為大丞相都督河北畿外諸軍事冬十月蕭衍以北海

王顥為魏主年號孝基入據南兗之鉅城二年夏四月

上黨王天穆齊獻武王大破邢杲於齊州之濟南杲降
送京師五月元顥克梁國內外戒嚴癸酉元顥陷滎陽
甲戌夜車駕北巡幸河內丙子元顥入洛戊寅太原王
爾朱榮會車駕於長子即日反旆上黨王天穆北渡河
會車駕于河內秋七月都督爾朱兆賀拔勝於硤石夜
濟破顥子冠爰及安豐王延明軍元顥敗走車駕入居
華林園昇大夏門大赦天下宴勞天柱大將軍爾朱榮
上黨王天穆及北來諸將於都亭出宮人三百繒錦雜

綵數萬疋頒賜有差三年春三月雍州刺史爾朱天光討醜奴蕭寶寅於安定破擒之囚送京師六月噉噉國獻獅子九月天柱大將軍爾朱榮上黨王天穆自晉陽來朝帝殺榮及天穆於明光殿大赦天下遣武衛將軍奚毅前燕州刺史侯淵帥衆鎮北中是夜左僕射爾朱世隆榮妻鄉郡長公主帥榮部曲焚西陽門出屯河陰攻河橋擒毅等屠害之據北中城南逼京邑十月通直散騎常侍假平西將軍都督李苗以火船焚河橋爾朱

世隆退走壬寅爾朱世隆亭建興之高都爾朱兆自晉陽來會之共推太原太守行并州刺史長廣王曄為主大赦所部年號建明十二月爾朱兆等寇丹谷都督崔伯鳳戰歿都督羊文義史五龍降兆大都督源子恭奔退爾朱兆爾朱度律自當平津上率騎涉渡以襲京城事出倉卒禁衛不守帝步出雲龍門逼帝幸永寧之佛寺殺皇子亂兵殺司徒公臨淮王彧僕射范陽王誨戊申元曄大赦天下爾朱度律自鎮京師爾朱兆遷帝於

晉陽崩於城內三級佛寺時年二十四中興二年謚為武懷皇帝太昌元年又謚孝莊皇帝廟號敬宗葬靜陵

節閔皇帝

後魏書曰節閔皇帝諱恭字修業廣陵惠王羽之子也母曰王氏帝少端謹有制度長而好學事祖母嫡母以孝聞正始中襲爵延昌中拜通直散騎常侍正光三年加散騎常侍領給事黃門侍郎以元義擅權遂稱疾不起久之因託瘖病五年就除金紫光祿大夫建義元年

除儀同三司既絕言垂將一紀居於龍華佛寺無所交通求安末有白莊帝者言王不語將有異圖民間遊聲又云有天子之氣王懼禍逃匿上洛尋見追攝執送京師拘繫多日以無狀獲免及莊帝崩爾朱世隆以元曄踈遠又非人望所推以王潛嘿晦身有過人量將謀廢立恐實不語乃令王所親申其意旨且兼迫脅王遂答曰天何言哉世隆等大悅春三月曄進至邙南世隆等奉王東郭之外行禪讓之禮太尉公爾朱度律進璽綬

袞冕之服及就輅車百官侍位入自建春雲龍門昇太極殿前羣臣拜賀禮畢遂登閭闔門詔大赦天下以魏為大魏改建明二年為普泰是月幽州刺史劉靈助起兵於薊撫軍將軍金紫光祿大夫兼侍中河北大史高乾邕及弟平北將軍通直散騎常侍高敖曹率衆夜襲冀州執刺史元疑魚力切共推前河南太守封隆之行州事三月封長廣王為東海王潁州王爾朱兆為天柱將軍晉州刺史平陽郡開國公高歡封渤海信都王夏四

月詔有司不得復稱偽梁罷細作之條無禁鄰國還往
高歡以爾朱逆亂始興義兵於信都西定殷州斬其刺
史爾朱羽生命南趙郡太守李元忠為刺史鎮廣河八
月追尊皇考為先帝皇妣為先大妃封皇弟永業為高
密王皇子一怒為青州渤海王既而高歡推立安定王
為帝於信都二年三月高歡敗爾朱天光等於韓陵夏
四月高歡使魏蘭根慰喻洛邑且觀帝之為人蘭根忌
帝雅德還致毀謗竟從崔陵橋議廢帝於崇訓佛寺而

立平陽王脩是為孝武帝五月帝遇弑殂於門下外省
時年三十五孝武帝詔有司赴會大鴻臚監護事葬用
王禮加以九旒鑾輅黃屋左纛班劍百二十人後西魏
追謚節閔皇帝

後廢帝安定王

後魏書曰後廢帝諱朗字仲哲章武王融第三子也母
曰程氏帝少稱明悟永安二年為泗州魯郡王後軍府
司馬元暉之建明二年正月為冀州渤海太守及高歡

起義兵將誅暴逆乃推戴之冬十月即皇帝位於信都
西升壇柴燎大赦稱中興元年以高歡為侍中丞相都
督中外諸軍事大將軍錄尚書大行臺增邑三萬戶以
無侍中撫河北大使高乾邕為侍中司空以前平北將
軍通直散騎常侍高敖曹為驃騎大將軍儀同三司冀
州刺史以終其身十二月高歡率師攻鄴城二年春正
月拔鄴城擒刺史劉誕二月高歡為大丞相柱國大將
軍太師增邑三萬戶并為六萬戶三月齊文襄王起家

為驃騎大將軍儀同三司車駕幸鄴閏月爾朱天光北
度律仲遠等屯於洹水之南高歡出屯紫陌爾朱兆率
輕騎三千夜襲鄴城中西門不克退走高歡大破爾朱
天光等四胡於韓林前廢帝鎮軍將軍賀拔勝徐州刺
史杜德於陣降爾朱兆走并州仲遠奔東郡天光度律
將赴洛陽大都督斛斯椿賈顯智倍道先還夏四月椿
等懼罪自劾尋擒天光度律於河橋西北大行臺長孫
稚都督賈顯智率騎入京師執爾朱世隆彥伯斬於都

衛口送天光度律於高歡爾朱仲遠奔蕭衍車駕至河陽仍遜於別邸大昌元年五月封安定郡王邑萬戶後以罪殂於門下省時年二十永熙二年塋鄴西南野馬岡

孝武皇帝

後魏書曰孝武皇帝諱脩字孝則廣平武穆王懷之第三子母曰李氏帝性沉厚少言好武事始封汝陽縣公拜通直散騎侍郎轉中書侍郎建義初除散騎常侍尋

遷平東將軍兼太常卿又為鎮東將軍宗正卿永安三年封平陽王晉泰初轉侍中鎮東將軍儀同三司兼尚書右僕射又加侍中尚書左僕射中興三年夏四月安定王自以疎遠未允四海之心請遜大位齊獻武王高歡與百僚會議僉謂高祖不可無後乃共奉王戊子即位於東郭之外入自陽雲龍門御太極前殿羣臣朝賀禮畢升閭闔門大赦天下改中興三年為大昌元年帝以世易復除齊獻武王為大丞相大將軍大將軍還鄴車駕餞

別於乾脯山殺大司馬汝南王悅大赦天下改大昌為永興
以同太宗時號尋改為永熙二年春正月車駕幸崧高
石窟靈岩寺十二月車駕狩於嵩陽遂幸溫湯車駕還
宮三年春二月壬子大赦壬午封左衛將軍元斌之為
潁昌王夏四月癸丑日有蝕之五月丙戌置勲府庶子
廂別六百人騎官廂別二百人閤內部曲數千人帝內
圖高歡乃以斛斯椿為領君使與王思政等統之以為
心膂軍謀朝政咸決于椿分置督將及河南關西諸刺

史辛卯下詔戒嚴揚聲伐梁實謀北討七月己丑帝總
六軍率南陽王寶炬清河王亶廣陽王湛斛斯椿以五
千騎宿於渥西楊王別舍沙門都維那惠臻負璽持千
牛刀以從有牛百頭盡殺以食軍士衆知帝將出其夜
亡者過半清河廣陽二王亦逃歸略陽公宇文泰遣都
督駱超李賢和各領數萬騎赴超先至甲戌賢和會帝
於峭中己酉高歡入洛遣婁昭及河南尹元子思領左
右侍官追帝請迴駕高昂率勁卒及帝於陝西帝揚鞭

長驚至湖城飢渴甚有王思村人以麥飯壺漿獻帝帝
甘之復一村十年帝至稠桑潼關大都督毛洪賓迎獻
食八月宇文泰遣大都督趙貴梁禦甲騎二千來赴乃
奉迎帝過河謂禦曰此水東流而朕西上若得重謁洛
陽廟是卿等功也帝及左右皆流涕宇文泰迎帝於東
陽帝勞之將士皆呼萬歲遂入長安以雍州公辭為宮
大赦甲寅高歡推司徒清河王亶為大司馬承制總萬
機居尚書省歡追車駕至潼關九月己酉歡東還洛陽

帝親督衆攻潼關斬其行臺華長瑜冬十月高歡推清河王亶子善見為主徙都鄴是為東魏魏於此始分焉
二十二日帝崩時年二十五謚曰孝武塋雲陵

文皇帝

後魏書曰文皇帝諱寶炬孝文皇帝之孫京兆王愉之子也母曰楊氏帝正始初生以父罪兄弟皆幽宗正寺及宣武崩乃得雪正光中拜直閣將軍時胡太后嬖寵帝與明帝謀誅之事泄免官武泰中封邵縣侯永安三

年追封南陽王孝武即位拜太尉加侍中永熙二年進位太保開府尚書令三年孝武與高歡構難以帝為中軍四面大都督及從入關拜太宰錄尚書事孝武崩丞相洛陽公宇文泰率羣公卿士奉表勸進三讓乃許焉大統元年春三月戊申帝即位於西城大赦改元追尊皇考為皇帝皇妣楊氏為后己酉進丞相洛陽公宇文泰都督中外諸軍錄尚書事大行臺改封安定郡公以尚書令斛思椿為太保廣平王贊為司徒乙卯立妃乙

氏為皇后二年春正月辛亥祀南郊改以神元皇帝配
東魏攻陷夏州三年冬十月安定公宇文泰大破東魏
軍於沙苑拜泰柱國大將軍四年春正月辛酉拜天於
清輝室終帝世遂為常二月東魏攻陷南汾潁豫廣四
州廢皇后乙氏三月立蠕蠕而蠢切女郁久閭氏為皇后
大赦秋七月東魏將侯景等圍洛陽帝與安定公宇文
泰東伐九月帝至自東伐五年冬十月於陽武門懸鼓
置紙筆以求得失六年春正月庚戌朝羣臣自西遷至

此禮樂始備七年十二月御憑雲觀以見諸王叙家人之禮手詔為宗戒十條以賜之八年春三月初置六軍十六年五月東魏靜帝遜位於齊秋七月安定公宇文泰東伐至恒農齊師不出乃還九月大赦十七年春正月庚戌帝崩於乾安殿年四十五塋於永陵謚曰文皇帝

廢帝

後魏書曰廢帝名欽文皇帝之長子也母曰乙皇后大

統元年正月乙卯立為皇太子十七年三月即皇帝位
二年秋八月大將軍尉遲迥克成都劔南平冬十一月
安定公宇文泰殺尚書元烈三年正月安定公宇文泰
廢帝而立齊王廓帝自元烈之誅有怨言淮安王育廣
平贊等並垂泣諫帝不聽故及於辱

恭皇帝

後魏書曰恭皇帝諱廓文帝之第四子也大統十四年
封為齊王廢帝三年五月即皇帝位改元十一月魏師

滅梁戕

士良切

梁元帝梁之諸臣復立泰元帝子方知為

皇帝都于建業三年春正月丁丑初行周禮建六官以
安定公宇文泰為太師冢宰以柱國李弼為大司徒以
趙貴為太保兼宗伯以尚書令獨孤信為大司馬以于
謹為大司寇以侯莫陳崇為大司空冬十月乙亥安定
公宇文泰薨十二月庚子帝遜位於周周閔帝元年正
月東魏封帝為宋公尋殂

東魏孝靜皇帝

後魏書曰孝靜皇帝諱善見清河文宣王亶之子也
母曰胡妃永熙二年拜通直散騎常侍秋八月為驃騎
大將軍開府儀同三司孝武帝既入關渤海王高歡奉
迎不克乃與百僚會議推帝以奉肅宗之後時年十一
冬十月即位大赦天下改永熙三年為天平元年有事
於太廟下詔曰安土能遷自古之明典所居靡定往昔
之成規是以殷遷八城周卜三地吉凶有數隆替無常
事由於通變理出於不得已故也高祖孝文皇帝仰觀

乾象俯協人謀發自武州來幸嵩縣魏雖舊邦其命維
新及正光之季國步孔棘喪亂不已寇賊相侵裨我生
民無所措手今遠遵古式深驗時事考龜襲吉遷宅漳
滏庶克隆基再昌寶歷主者明為條格及時發邁車
駕北遷詔渤海王高歡留後部分以衛軍大將軍尚書
令元弼為驃騎大將軍儀同三司洛州刺史鎮洛陽十
一月車駕至鄴是冬蕭衍以元慶和為鎮北將軍魏王
入據平瀨鄉孝武崩於長安二年春正月渤海王高歡

襲擊山胡劉彞升大破之詔以高歡為相國假黃鉞劍履上殿入朝不趨王固讓不受三月高歡討劉彞升斬之彞升子高海王復僭帝號歡追擊破擒之及其弟西海王皇后夫人王公以下四百餘人并獲逋逃之民二萬餘戶八月發衆七萬六千人營新宮十二月車駕待於鄴是歲西魏文帝大統元年三年春正月詔加渤海王世子澄使持節尚書令大行臺大都督秋七月大赦天下四年夏四月遷七帝神主入新廟大赦天下通使

蕭衍冬十一月西魏遣其大行臺元帥李海大都督獨
孤信願逼洛州行軍事廣陽王湛棄城退還李海信願
遂據金墉潁川長史賀若徽執刺史田迅西叛引西魏
都督梁迴據城西魏又遣其都督趙繼宗右丞韋孝寬
等攻陷豫州元象元年春正月有巨象至自碭郡陵中
南兖州獲送于鄴大赦改年大都督賀拔仁攻西魏南
汾州拔之率豫州刺史堯雄等與大行臺侯景司徒高
敖曹大都督万俟受洛干等於北豫相會俱討潁州梁

迴等棄城遁走潁州平秋七月行臺侯景司徒高敖曹圍西魏將獨孤信願於金墉城八月大敗西魏於河陰司徒高敖曹儀同三司大都督李猛宗顯並戰沒西魏留其長孫子彥守金墉渤海王高歡濟河子彥棄城走興和元年五月納皇后高氏大赦天下秋七月詔渤海王高歡為相國錄尚書事大行臺固辭相國乃允是月發畿內民夫十萬人城鄴城四十日罷十一月以新宮成大赦改元二年春正月徙新宮大赦天下三年冬十

月詔羣臣於麟趾閣議新定班制頒於天下發夫五萬人築漳濱堰四年夏四月渤海王高歡請令百官月一面敷政事明揚側陋納諫屏邪親理獄訟武定元年春正月大赦改年車駕蒐於邯鄲之西山三月渤海王高歡討宇文黑獺於印山大破之擒西魏臨洮王森蜀郡王榮宗江夏王昇鉅鹿王闡譙郡王亮追奔至恒農而還豫洛二州平二年正月渤海王高歡請在并州置晉陽宮以處配沒之口三月渤海王世子高澄為大將軍

五年春正月渤海王高歡薨於晉陽司徒侯景反潁州刺史司馬世雲以城附之景入據潁城誘執豫州刺史高元成廣州刺史暴顯等司空韓軌驃騎大將軍儀同三司賀拔仁驃騎大將軍儀同三司可朱渾道元左衛將軍劉豐等率衆討之景乃遣使降於西魏請師救援西魏遣使將李景和王思政帥騎赴之思政等入據潁州景乃出走豫州侯景復背西魏歸於蕭衍蕭衍署景河南大將軍承制六月司徒韓軌司空可朱渾道元等

自潁州班師大將軍高澄迎勞於石濟高澄還晉陽秋
七月以大將軍高澄為使持節大丞相都督內外諸軍
事錄尚書行大行臺渤海王九月蕭衍遣其兄子貞陽
侯淵明率衆寇徐州堰泗水于寒山以灌彭城冬十月
以尚書左僕射慕容紹宗為東南道行臺與驃騎大將
軍儀同三司大都督高岳潘相樂討淵明十一月大破
之擒淵明及其二子六年正月大都督高岳等戰於渦
陽大破侯景俘斬五萬餘人溺於渦水水為之不流景走

淮南冬十月侯景濟江推蕭衍子臨賀王正德為主以
攻建業七年蕭衍弟徐州刺史中山侯蕭正表以鍾離
內屬三月侯景尅建業還以蕭衍為主衍弟子北襄州
刺史定襄侯蕭祗湘潭侯蕭退來降夏四月詔渤海王
高澄讚拜不名入朝不趨劍履上殿是月侯景殺蕭衍
立子綱為主六月尅潁州擒西魏大將軍尚書左僕射
東道大行臺太原郡開國公王思政潁州刺史皇甫僧
顯及戰士男女數萬口八月盜殺渤海王高澄甲午太

原公高洋如晉陽八年春正月帝為渤海王高澄舉哀
於東堂詔太原公高洋嗣事二月進爵為齊王夏五月
詔齊王為相國總百揆進九錫以齊國太妃為王太后
詔歸帝位於齊王即日遜居別宮齊天保元年封中山
王二年冬十月殂時年二十八謚曰孝靜皇帝葬於漳
西山岡

太平御覽卷一百四

欽定四庫全書

太平御覽卷一百五

宋 李昉等 撰

皇王部三十

後周太祖文皇帝

孝閔皇帝

明皇帝

武皇帝

宣皇帝

靜皇帝

後周太祖文皇帝

周書曰太祖文皇帝姓宇文氏諱泰字黑獺代郡武川人其先出自炎帝為黃帝所滅子孫遁居朔野有葛烏克者雄武多算畧鮮卑慕之奉以為主遂總十二部落世為大人其後裔孫曰普回因狩得玉璽三紐有文曰皇帝璽普回異之以為天授其俗謂天曰字謂君曰文因號宇文國并以為氏焉太祖德皇帝之少子也母曰王氏初孕五月夜夢抱子昇天纔不至而止寤而告德皇帝德皇帝喜曰雖不至天貴亦極矣魏孝昌二年燕

州亂太祖始以統軍從爾朱榮征之先是北海王顥奔
梁梁人立為魏王令率兵入洛魏孝莊帝出居河內以
避之榮遣賀拔岳討顥仍迎孝莊帝太祖與岳有舊乃
以別將從岳及孝莊帝反正以功封寧都子邑三百戶
遷鎮遠將軍步兵校尉万俟音墨醜奴作亂關右孝莊
帝遣爾朱天光及岳等討之太祖遂從岳入關先鋒破
魏行臺尉遲菩薩等及平醜奴定隴右太祖功居多遷
征西將軍金紫光祿大夫增邑三百戶加直閣將軍行

原州事太常元年岳以太祖為左丞相領岳府司馬加散騎常侍事無巨細皆委決焉表太祖為持節衛將軍夏州刺史魏永熙三年正月岳與侯莫陳悅討曹泥三月岳為悅所害四月太祖率輕騎臨悅軍悅大懼太祖驅兵奮擊大破之悅遁走追及斬之魏帝遣著作郎姚幼瑜持節勞軍進太祖侍中驃騎大將軍開府儀同三司關西大都督洛陽縣公承制封拜使持節如故七月丁未從帝洛陽率輕騎入關太祖備儀衛奉迎謁見東

陽八月齊神武襲陷潼關侵華陰太祖率諸軍屯霸上
以待之齊神武留其將薛瑾守關而退太祖乃進軍襲
瑾虜其卒七千還長安進位丞相冬十月齊神武推魏
清河王亶子善見為主徙都於鄴是為東魏閏十二月
魏孝武帝崩太祖立魏南陽王寶炬為嗣是為文皇帝
大統十七年春三月魏文帝崩皇太子嗣位太祖以冢
宰總百揆三年魏帝有怨言魏淮安王育廣平王贊等
垂泣諫之帝不聽於是太祖與公卿定議廢帝立齊王

鄔是為恭帝元年夏四月帝大饗羣臣魏史柳虬執簡
書於朝曰廢帝文皇之嗣子年七歲文帝託於安定公
曰是子也才由於公不才亦由於公公其勉之公既受
茲重寄居元輔之任又納女為皇后遂不能訓誨有成
致令廢黜負文皇帝付囑之意此咎非安定公而誰太
祖乃令太常卿盧辯作誥諭公卿曰嗚呼我羣后暨眾
士維文帝以襁褓之嗣託於予訓之誨之庶厥有成而
予固能草變厥心庸暨乎廢墜我文皇帝之志嗚呼茲

咎予其馬避予實知之矧爾衆人之心哉惟予之顏豈
惟今厚將恐來世以予為口實乙亥魏帝詔封太祖子
邕為輔城公憲為安城公邑各二千戶三年九月太祖
有疾還至雲陽命中山公護受遺輔嗣子冬十月崩於
雲陽宮還長安發喪時年五十三葬于城陵謚曰文公
孝閔帝受禪追尊為文王廟曰太祖武成元年追尊為
文皇帝

孝閔皇帝

後周書曰孝閔皇帝諱覺字施羅尼太祖第三子也母曰元皇后大統八年生於同州七歲封畧陽郡公時有善相者史元華見帝退謂所親曰此公子有至貴之相但恨其壽不足以稱之耳魏恭帝三年二月命為安定公世子十月乙亥太祖崩世子嗣位為太師大冢宰十二月丁亥魏帝詔以岐陽之地封帝為周公庚子禪位於帝元年春正月辛丑帝乃即天王位柴燎告天朝百官於路門追尊皇考文公為文王皇妣為文后大赦天

下封魏帝為宋公帝性剛果見晉公護執政深忌之司
會李植軍司馬孫恒以先朝佐命入侍左右亦疾護權
重乃與宮伯乙弗鳳賀拔提等潛謀請帝誅護帝許之
又引宮伯張光洛同謀光洛密白護護乃出植為荊州
刺史恒為潼州刺史鳳等遂不自安更奏帝將召羣臣
入因此誅護光洛又白之時小司馬尉遲綱搃統宿衛
兵護乃召綱共謀廢立令綱入殿中詐呼鳳等論事既
至以次執送護第並誅之綱乃罷禁兵帝方悟無左右

獨在內殿令宮人持兵自守護又遣大司馬賀蘭祥逼帝遜位遂幽舊邸月餘以弑崩時年十六護誅後謚孝閔皇帝陵曰靖陵

明皇帝

後周書曰明皇帝諱毓小名統萬突太祖長子也母曰姚夫人永熙三年太祖臨夏州生帝於統萬城因以名焉大統十四年封寧都郡公十六年行華州事尋拜開府儀同三司宜州諸軍事宜州刺史魏恭帝三年授大

將軍鎮隴右孝閔踐祚進位柱國轉岐州諸軍事岐州
刺史治有美政黎民懷之及孝閔帝廢晉公護遣使迎
帝於岐州秋九月癸亥至京師止於舊邸甲子羣臣上
表勸進備法駕奉迎帝固讓羣臣固請是日即天王位
大赦天下乙丑朝羣臣於延壽殿武成元年春正月乙
酉太師晉公護上表歸政帝始親覽萬幾軍旅之事護
猶總馬初改都督諸州軍事為總管八月己亥改天王
稱皇帝追尊文王為文皇帝大赦改元二年春正月癸

丑朔大會羣臣於紫極殿始用百戲三月辛酉重陽閣成會羣公列將卿大夫及突厥使者於芳林園賜錢帛各有差夏四月帝因食遇毒庚子大漸辛丑崩於延壽殿時年二十七謚曰明皇帝廟稱世宗葬昭陵

武皇帝

後周書曰高祖武皇帝諱邕字禰羅突太祖第四子也母曰叱奴太后大統九年生於同州有神光照室幼而孝敬聰敏有器質太祖異之曰成吾志者必此兒也年

十二封輔城郡公孝閔帝踐祚拜大將軍出鎮同州世祖即位遷柱國授蒲州諸軍事蒲州刺史武成元年入為大司空治御正進封魯國公領宗師甚為世宗所親愛朝廷大事多共參議性沉深有遠識非因問終不敢言世宗每嘆曰夫人不言言必有中武成二年世宗崩遺詔傳位於帝帝固辭百官勸進乃從之壬寅即皇帝位大赦天下保定元年春正月戊寅詔曰寒暑亟周奄及徂歲改元命始國之典章朕承寶圖宜遵故事可改

武成三年為保定元年嘉號既新惠澤宜溥文武百官
各增四級以大家宰晉國公護為都督中外諸軍事四
年十月詔大將軍大家宰晉國公護率軍伐齊於太廟庭
授以斧鉞於是護乃率軍出潼關大將軍權景宣率山
南諸軍出豫州少師楊標出軹關天和元年正月大赦
改元五月甲午詔曰道德交喪禮義嗣興褒四始於一
言美三千於為敬是以在上不驕滿而不溢富貴所以
長守邦國於焉久安故能承天靜地和民敬鬼明並日

月道合四時朕雖庸昧有志前古甲子乙卯禮云不樂

養弘表昆吾之稔杜蕢

若怪切

有揚解之文自世道喪亂

禮義紊毀此典茫然已墜於地昔周王受命請聞顓頊
廟有戒盈之器室為復禮之銘矧伊未學而能忘此宜
依是日省事停樂庶知為君之難為臣不易貽之後昆
殷監斯在四年春正月辛卯朔廢朝以齊武成薨故也
遣司會河陽公李綸等會葬於齊仍弔賻焉建德元年
三月癸卯朔日有食之齊遣使來聘丙辰誅大冢宰晉

國公護護子柱國譚國公會會弟大將軍莒國公至崇業公靜并柱國侯伏侯龍恩龍恩弟大將軍壽大將軍劉勇等大赦改元罷中外府二年秋七月己巳祠太廟自春末不雨至於是月壬辰集百寮於大德殿帝責躬罪已問以治政得失五年十月乙酉帝總戎東伐以越王盛為右一軍總管圜國公亮為右二軍總管隋國公楊堅為右三軍總管譙王儉為左一軍總管大將軍竇恭為左二軍總管廣化公丘崇為左三軍總管齊王憲

陳王純為前軍六年春正月尉遲勒擒齊王及其太子
恒於青州四月乙巳至自東伐列齊王於前其王公等
並從車輦旗幟及器物以次陳於其後授大駕布六軍
備凱樂獻俘於太廟京邑觀者皆稱萬歲戊申封齊王
為溫國公宣政元年三月於蒲州置宮廢同州及長春
宮甲戌初服常冠以皂紗為之加簪而不施纓導其制
若今之折角巾也上大將軍郅國公王軌破陳師於呂
梁擒其將吳明徹等俘斬三萬餘人五月己丑帝總戎

北伐遣柱國平原公姬願東平公宇文靜舉等率軍五道俱入發關中公私驢馬悉從軍癸巳帝不豫止於雲陽宮丙申詔停諸軍事六月丁酉帝疾甚還京其夜崩於乘輿時年三十六謚曰武皇帝廟稱高祖塋孝陵

宣皇帝

後周書曰宣皇帝諱贇字乾伯高祖長子也母曰李太后武成元年生於同州保定元年五月丙子封魯國公建德元年四月癸巳高祖親告廟冠於阼階立為皇太

子詔皇太子巡撫西土文宣皇后崩高祖諒陰詔太子
總朝政五旬而罷高祖每巡幸四方太子常留監國五
年二月又詔皇太子巡西土因討吐谷渾宣政元年六
月丁酉高祖崩戊戌太子即皇帝位尊皇后為皇太后
大象元年春正月癸酉受朝於露門帝服通天冠絳紗
袍羣臣皆服漢魏衣冠大赦改元大成初置四輔官以
上柱國大冢宰越王盛為大前疑相州總管蜀國公尉
遲迥為大右弼中國公李穆為大左輔大司馬隋國公

楊堅為大後丞二月辛巳詔曰皇太子衍地居上嗣正統所歸遠憑積德之休允協無疆之祚帝王之量不肅而成天祿之期不期已至朕今傳位於衍乃睠四海深合謳歌之望俾予一人高臨風塵之表萬方兆庶知朕意焉可大赦天下改大成元年為大象元年帝於是稱天元皇帝所居稱天皇寃二十有四旒車服旗鼓皆以二十四為節內史御正皆置上大夫皇帝衍稱正陽宮置納言御正諸御等官皆准天臺尊皇太后為天元皇

太后二年五月甲午夜帝備法駕幸天興宮乙未帝不
豫還宮詔隋國公堅入侍疾己酉大漸御正下大夫劉
昉與內史上大夫鄭譯矯制以隋國公堅受遺輔政是
日帝崩於天德殿時年二十二謚曰宣皇帝葬定陵

靜皇帝

後周書曰靜皇帝諱衍後改為闡宣帝長子也母曰朱
皇后建德二年六月生於東宮大象元年正月癸卯封
魯王戊午立為皇太子二月辛巳宣帝於鄴宮傳位授

帝居正陽宮二年夏五月乙未宣帝寢疾詔帝入宿於
露門己酉宣帝崩帝入居天臺廢正陽宮大赦天下停
洛陽宮作大定元年春正月壬午詔曰朕以不天夙遭
極罰光陰迅速遽及此辰窮慕纏綿言增號絕踰祀草
號憲章前典可改大象三年為大定元年二月庚申大
丞相隋王楊堅為相國總百揆備九錫之禮又加冕十
有二旒建天子旌旗出警入蹕並依魏晉故事甲子隋
王楊堅稱尊號帝遜於別宮隋氏奉帝為介國公邑萬戶

車服禮樂一如周制上書不為表答不稱詔有其文事
竟不行開皇元年五月壬申崩時年九歲謚曰靜皇帝
葬恭陵

太平御覽卷一百五